

PPA A ABSTENE DI VOTA DEN STATEN PA CAMBIO DI STATUUT

ORANJESTAD(AAN)—D'En Staten Partido Patriotico Arubano a abstenese su mes di vota ariba e ley di reino pa cambio di Statuut.

Manera ta conoci diasabra a tuma lugar den Staten di Antillas e tratamiento di e ley di Reino cu a ser aproba algun siman pasa den 1 e y 2e kamer di Hulanda.

Segun PPA, manera ta conoci, den 1e Kamer representante di Partido Patriotico Arubano ariba instruccionnan di directiva y Consejo di Partido a participa na 1e Kamer cu PPA ta pro Status Aparte pa Aruba pero cu PPA ta rechaza e hecho cu e derecho di autodeterminacion di Aruba tabata wordo limita door di e condicionnan Hulandes, esta un koppelmento na independencia di Aruba pa dia prome di januari 1996.

PPA ta bisa di ta realiza claramente cu e pueblo Arubano no a fiha e fecha aki, y ta bay mas leu ainda esta cu esnan cu a forma parti di e delegacion cu a bay cu un mandato di Eilandsraad na 1983 no tabata tin mandato di Eilandsraad pa yena fecha di tal independencia, segun e partido a laga sa.

Den 1e Kamer pues a wordo participa cu PPA lo no bay duna sosten na e ley pa cambio di Statuut, ora esaki bini den tratamiento aki na Antillas.

Diasabra e representante di PPA den Staten ariba instruccionnan di partido a duna contenido na e posicion aki door di abstenese su mes di participa den votacion ariba tal topico.

PPA a fiha e posicion aki, pa diferente motibo: - Pueblo Arubano mes no a fiha e fecha di independencia.

—E derecho di autodeterminacion di Nacionnan Uni ta wordo acepta pa resulta den otro formanan fuera di independencia por ehemplo integra-

cion di un pais (provincia), Estado Asocia pues tambe Status Aparte.

— Door di abstenese di aproba e fecha den e ley, PPA por para cu mas credibilidad pa bringa e fecha aki den futuro ariba foro internacional y den Reino.

PPA ta bisa den su punto 4 "Mientras cu den un periodo di apenas seis luna Hulanda no por a mira e consecuencianan di cierto desarollonan, corda pa nos mira consecuencia di cierto desarollonan den un periodo di 10 aña".

Segun PPA, e partido ta conciente a la vez di e paso mas cerca di e pueblo su deseo tan anhela y PPA lo haci tur su empeño pa den futuro sigui duna un contribucion na e proceso di Aruba pa drecha locual MEP a daña ariba tereno di gobernacion.

Por lo tanto PPA a duna e mes instruccionnan na su fraccion den Eilandsraad di Aruba, pa duna contenido na e posicion di no sostene e ley di Reino aki, esta su esencia Independencia pa prome di januari 1996 door di abstenese su mes di votacion.

PPA a ripiti cu e partido ta pro Status Aparte, pero PPA ta contra e hecho cu Hulanda a acopla e independencia di Aruba na esaki, sin cu e fecha a wordo fiha pa pueblo di Aruba.

Den Staten ala vez un mocion a wordo presenta door di Sr. Betico Croes firma pa tur representante Arubano cu ta bisa cu mester tene cuenta cu e conferencia di evaluacion manera desea door di Aruba y un referendum pa pueblo por duna opinion encuan to e fecha di independencia.

"Ta hustamente e hecho cu e mocion aki a wordo presenta den Staten, a hustifica mas cu nunca e posicion di no duna sosten na e ley di Reino pasobra e mocion ta bisa cu mester respeta

e deseonan Arubano ariba e punto aki, mientras e ley di Reino no ta respeta e deseonan encuestacion. Pueblo Arubano mes por huzga cada politico cu ora di votacion ariba e ley a vota pro, pues a aproba e fecha

definitivo di independencia den e ley y cinco minuut despues a vota pa un mocion unda ta pidi pa e deseonan di pueblo

Arubano wordo respeta, locual den e ley no tabata e caso", PPA a splica aye-

ra den un comunicado firma pa Secretario di e partido, sr. Dolfi Jansen.

Pa Tal motibo fraccion di PPA a abstenese su mes di vota ariba e ley y pa vota pro e mocion en cuestion.

OTRO INSPECTOR DI POLIS PA ARUBA

ORANJESTAD(AAN)—Awe ta yega for di Hulanda otro inspector di polis y ta trata di Alwin Nectar cu algun aña pasa a sali pa Hulanda pa sigui su estudio di Inspector na school di polis na Apeldoorn.

El a termina su estudio cu exito y a core stage na algun ciudad na Hulanda.

Awe e lo ser ricibi pa un comision di coleganan pa 8 or anochi na aeropuerto y den curso di e

siman aki lo reanuda su trabao den Cuerpo Policial na Aruba.

E tabata Hoofdagent den cuerpo policial na Aruba prome cu el a viaja pa Hulanda.

VICTIMA DI TRAFICO TRANSPORTA PA MERCA

ORANJESTAD(AAN)—Ayer a sali pa Merca un di e personanan cu a ser herida den e desgracia cu a causa bida di e turista sophia Brio.

E ruman Michael Brio a regresa Merca caba despues di tratamento na hospital, y ayera a trans-

porta e homber John Hesse kende a ser acompaña pa un medico cu a bini di Estados Unidos, New York, especialmente pa esaki.

El a kibra un pia, ambos braza y un dede den e accidentel.

Den curso di awe, se-

gun DIARIO tin entendido, lo transporta cadaver di Sophia Brio tambe pa Estados Unidos.

No ta conoci sin embargo si e ruman muher cu tabata grave, Orelia Brio, tambe lo ser transporta pa merca awe.

SUPUESTO ATRACO CU VIOLENCIA

ORANJESTAD(AAN)—Ayer mainta mas o menos 6.30 or polis a ser informacu tras di un negoshi den Wilhelminastraat tin un homber drumi for di su tino y cu lo tin sanger ta sali for di e persona aki.

Ora cu polis a yega na e sitio a resulta cu ta trata di e homber di inicial S.T. di 47 aña kende a ser transporta mes ora cu ambulance pa hospital.

Su situacion tabata bastante grave ya cu te ayera tardi e no a recobra su conocimiento.

Ta ser sospecha cu den e caso aki, atraco lo a hunga un papel importan-

te, esta cu e homber lo a ser asalta pa ladroncia di su cartera cu posibel contenido, ya cu banda di dje

a ser haya su cartera.

Segun informacion e caso no a tuma lugar mucho di cas di e victima.

POCO POLIS NA TRABAO DURANTE WEEKEND

ORANJESTAD(AAN)—Na e wardanan di polis durante weekend especialmente ayera por a nota cu ta masha poco agente policial tabata na trabao.

Alto funcionarionan policial tabata traha durante henter dia pa asina por a mantene vigilancia ariba nos isla durante dia

y anochi.

Awe merdia pa 2 or lo tin e reunion entre e Bondnan di Polis y Gobierno Central y Gobierno Insular di Aruba, cual lo ta continuacion di e reunion anterior durante cual e bondnan di polis a entrega un lista di punto cu nan kier mira aproba.